

張文襄公全集

劉春霖題



張文襄公全集卷一百五十四

電牘三十三

致上海盛京堂

光緒二十三年十月初六日亥刻發

各洋人紛傳比國借款必不成因內多法國款嫌息輕
不借等語甚爲懸系尊處如有確信祈速示東洋焦炭
最爲要著長策閣下何不借錢與伊令其速造爐開煉
乎或與彼商由我派人徑赴東洋設爐自煉或作爲合
夥豈不更有把握與條約似無妨礙望裁酌開平事商
有眉目否若不加價終恐作難祈復本日三電并悉運
津若僅槍礮則各輪皆可裝矣語

致漢口德國欽差海大臣

光緒二十三年十月初七日亥刻譯洋文發

昨晚接貴大臣照會知前日貴國兵船隨員等登岸時有無知之徒擲石生事等情聞之深爲耿歉不安貴大臣遠來遊歷本部堂諸事優禮備極款洽甚爲欣慰睦誼方深乃忽有此事殊出意料之外當卽傳到江夏縣嚴加申飭令其查拏滋事之人懲辦頃據該縣稟已經查出八人係前日隨同生事者均卽重責枷號局門示衆並卽出示嚴切曉諭因本日武鄉試開闔本部堂係監臨官須親到教場午後始回署照覆備文一時不能迅速深恐貴大臣懸念故特派江漢關道瞿道先往代

爲道歉除一面卽行照覆外先此電達初七日

致襄陽錢副將永林李遊擊福田

光緒二十三年十月十二日戌

刻發

支電悉皖北招年少馬勇派李福田前往卽咨江皖豫三省知照惟新招馬勇務須選年在二十以內體壯性馴皆能識字者方爲合格文

致宜昌趙凌兩道台黃守朱令

光緒二十三年十月十六日辰刻發

翰電悉巴東紙伊溪采煤煮鹽係爲救濟窮民起見准其試辦惟只可勸諭紳富集股不可動用官款責成黃守會同朱令祖蔭妥辦卽轉飭遵照諫

致宜昌趙凌兩道合施南魯守蔡令

光緒二十三年十月十八

日己刻發

文電悉傳鎮前所交銀七千三百餘兩銀元五千八百餘元錢八千串均准專濟鑛務惟各鑛只宜收買不宜開采只宜以現款買現鑛無論員紳商民均不准豫先借墊免致款歸無著尤不准以官款入股務須隨收隨運往復流通鑛價相宜卽買過貴卽停操縱因時官民兩利總之萬不可發官本此爲要著各鑛惟礪本輕產旺而易銷務宜與銅鉛等鑛並收建始礪鑛欠款究有若干須速清結以後或電或稟開鑛之鑛用金旁硫礪

之礮用石旁以免淆混嘯

致天津王制台

光緒二十三年十月二十二日已刻發

箇電悉此由兗州殺斃德教士二人而起彼垂涎已久藉端尋衅耳德使海靖此時又不在京惟有請總署速電許竹使向外部理論想台端已籌及矣日來情形祈隨時電示至盼禱

致柏林許欽差

光緒二十三年十月二十八日亥刻發

德兵船占踞膠州灣一事聞總署已電閣下向外部理論聞正犯已獲多名頃聞人言教士被戕時德國主教徑電德國君主言德教士爲兵丁所殺必有官主使德

引文彙編全集 卷一百五十四
主接電甚怒立電在華之水師副提督帶兵船赴膠州
嗣德主教第二次電德廷言係爲舊兵丁所殺舊兵者
猶言革兵卽散勇也德廷接此電後立即電水師副提
督離開膠州此電於十月十八日到滬其時德使海靖
已由滬赴津該使到津必接此電矣是德廷本無欲占
膠州之意亦無開衅之心乃誤聽教士初次電語故旋
卽飭離開膠州但日來德報皆力勸政府勿讓還膠灣
誠恐德政府惑於衆議德提督藉事邀功將錯就錯始
終占踞特此密達以備裁酌措詞勘

致天津王制台

光緒二十三年十月二十八日亥
刻發

聞容閔在總署呈請報効百萬造鎮江至京鐵路先有
粵人來鄂議清江至京路已駁止蓋清江興工則蘆漢
必廢事關大局擬公電力阻其文曰前有粵人到鄂條
陳有洋商願合股辦鎮江清江至京鐵路允報効鉅款
往復會商查蘆漢一路爲各省中權南可通極邊之粵
北可避近海之津是以奉旨定議舉辦中外周知僉謂
得要若清江別開一路則東南客貨均爲所奪蘆漢將
來斷不能集華股還洋債蘆漢一路必致停廢無成查
光緒二十一年六月初十日之洞遵旨電奏清江造鐵
路十弊有云一國之內幹路不能多設創始偏東則近

西幹路不能再舉將來引而加長如南達湘粵西達川
陝均遠等語當奉電旨飭籌蘆漢如何辦法是東路不
及西路有益已甚明晰中國物力異常艱窘儻屬華商
資本豈能兩路並舉徒自爭競似應令該華商併力先
辦蘆漢如有真正華款總公司必當付以事權決不掣
肘至於報効鉅款其爲洋股可知無論何路皆不可准
餌我小利必受大害除駁止外但恐洋人旣聳華人出
頭必不肯遽止如有人赴京條陳可否請發交韶洞等
詳酌議復再請鈞處核定免礙蘆漢以維大局文韶之
洞宣懷謹肅云如尊意相同卽請酌改速發洞宣勘

致漢口盛京堂

光緒二十三年十一月初一日已刻發

豔亥電悉比款議妥欣慰德果以鐵路入條款咄咄逼人粵漢路亦須速定遲必爲強人所奪前面談已詳祈速籌卽示復東

致漢口盛京堂

光緒二十三年十一月初十日午刻發

昨津電德事甚急查六條以鐵路爲最要不許則難了輕許則貽害此間現議甯滬一路流弊尙少若以此易彼或可解圍惟交還二字恐有別情請速召錫樂巴將洋文原電呈出細繹交還二字語意究作何解有無流弊如尙無他似可速電總署以此抵去一條實於大局

有益而甯滬路成矣尊意如謂然請於今日五六點鐘
惠臨面商一切是否均祈速復蒸

致長沙陳撫台

光緒二十三年十一月十五日己
刻發

庚電悉湘紳呈請創立湘粵鐵路公司集股開辦公舉
黃道總辦具見湘紳卓識遠慮台端提倡宏力欣慰之
甚惟湘紳尙未悉鐵路甘苦曲折朝廷於鐵路一舉招
商借債絕不擔肩蔣道德鈞面奉邸諭須自行籌款乃
可議准去年設立總公司總署原奏蘆漢粵漢南北幹
路合爲一氣領帑千萬集股千萬餘借洋債陸續分還
互相挹注現今蘆漢以部款千萬官股三百萬爲底本

並借洋債四百萬鎊由總公司訂約國家僅批准而不肯擔保各國以爲難比人利其製造始首肯粵漢大約亦需將及三千萬擬集商股七百萬爲底本餘借洋債總公司現招粵滬各商聞已得四百餘萬訂定而未收湘中集股尙無約數粵商亦尙無著落竊恐粵商股亦必請另設一總辦粵商力厚未必肯附入湘商而鄂中武昌以南一段亦未言及似須將粵漢路程起訖商股大約數目洋債如何籌借如何議還議有大概主意始能陳奏大抵粵漢總辦若能獨任華股七百萬並擔當洋債二千餘萬自可另樹一幟否則應由湘粵鄂三省

各舉一總辦仍照總署奏准原案不脫總公司方無窒礙事亦輕而易舉總之權可分利可共章程不可不貫通綱領不可不畫一各省路權儘可各省分任路利必須公溥均霑而造路之本資借款抵押之辦法通行之章程必須蘆漢粵漢一大幹路合爲一氣遞招遞墊遞修遞押遞借遞招展轉相生則此三千萬之路有股數百萬即可一氣銜接騰挪輓轡周轉以底於成不惟如此方與奏案相符且非此必辦不成也昨與盛京堂熟商大致似須如此爵堂方伯意見亦同如尊意謂然請速囑熊庶常蔣觀察來鄂面商妥貼再會奏卽示復咸

致長沙陳撫台

光緒二十三年十一月十六日卯刻發

湘鄂小輪一事黃道嗣東自湘來所言尙未明晰鄙人酌中定議極力推廣仍嚴定限制現擬令湘鄂兩省通籌合辦行長江者准其拖貨行湖南者仍不准拖貨外江內湖成本合湊利息均分湖北商股有限湖南商股易集儘可添入長江至南北商本孰多孰少或南七北三或南八北二均在所不問其長江一路上推廣至宜昌下推廣至武穴但不准出楚境至九江以免與招商局章程有礙惟長江小輪只准拖貨不准載貨既免招商局阻攔且不致奪釐金以歸洋稅至船數多少並不

限制多多益善所以特准長江拖貨者日本新添長江
十輪加以三公司及野雞輪與其外人專利自不如令
湖南紳商均需所以不准內湖拖貨者專爲恐引洋人
通商一端並未慮妨釐金蓋南省亦有釐局章程果善
湘不畏損釐鄂何畏焉長江地廣貨多果能擴充二三
十小輪亦不嫌多儘有商利可圖湘商准享長江拖貨
之利與內湖獲利何殊至於引洋人入湘一節萬分可
懼膠州一案只以殺兩教士遂至興兵據地多款要挾
昨接京電膠灣已決計不還并已許福建之三都地方
爲泊船地至六款尙在外六款中惟修山東全省鐵路

一條最爲毒惡其詭謀已見德報非尋常鐵路也若許之則山東已非我有北抵畿輔南至清淮引狼入室全失險要實爲交涉以來未有之奇變總署能峻拒與否尙不可知各國兵船雲集均欲趁此染指俄已有所索方今國勢太弱但生一衅卽有危亂之禍若湘省果開口岸設傷一二洋人中國不可問矣洞與公同膺疆寄豈敢當此重咎將來豈能保湘省永不通商但不自我發端問心稍免疚悔若湘輪拖鑛拖煤前已批准自可照行至此項小輪旣准拖貨自應正名商局方受稽察鈐束發議請辦者雖出搢紳將來設局管事者仍是商

董此層界限亦須分明洞於此舉先添沙市繼添宜昌
武穴又添長江拖貨又准湘商多入長江股分其爲南
北兩省利民計者不爲不厚南北兼籌不爲不公至外
人巨禍大局安危守之不得不嚴他日如洋人自創湘
省通商之局則我有現成數十小輪卽日可來往湘鄂
任意載貨仍可占其先著並不爲遲以上各節統請卓
裁示復并望黃署臬及湘紳一閱咸

致漢口盛京堂

光緒二十三年十一月十六日亥刻發

倭租界先商總署極妙惟我路穿倭界終恐將來有流
弊耳能稍曲向內繞行其後否請與錫海兩洋人熟商